

Federacionnan cu ta miembro di COA a aproba presupuesto y plan di maneho pa 2013



Durante reunion di COA cu miembronan di Federacion.

ORANJESTAD - E Asamblea General cu a wordo teni recientemente cu e gran mayoria di federacionnan miembro presente, a aproba e presupuesto como tambe e plan di maneho di Comité Olímpico Arubano pa loke ta e aña 2013. E directiva di Comité Olímpico Arubano a haya e sosten necesario pa asina continua den e forma cu ta maneha e organizacion cupula di deporte di nos pais. Durante e asamblea, COA y su miembronan a repasa e aña

deportivo unda a intercambia e informacionnan cu a bay den un forma masha positivo.

DOS ASAMBLEA

Ta bon pa bisa cu COA tur aña ta celebra dos asamblea, esta e reunionnan general cu tur su 24 federacionnan deportivo miembro. E prome asamblea ta pa trata e relato financiero y e relato di tur e actividadnan di e aña anterior, mientras cu den e segundo mita di aña ta celebra un asamblea pa trata e presupuesto y e plan di maneho pa e proximo aña.

E asamblea a inicia unda Presidente di COA, Sr. Roy Mezas, a resumi con e aña deportivo 2012 por lo general a bay y kico tur tabata e obhetivonan logra y realisa. Tambe a trece padilanti e puntonan unda mester demostra mehoracion pa loke ta e aña 2013. Como highlight di 2012 Sr. Mezas a menciona e Weganan Olímpico di Londres, cerando asina e ciclo olimpico di 4 aña.

Tesorero Sr. Edwin Roos a presenta e presupuesto pa 2013. Un serie di pregunta a ser haci di parti di e federacionnan presente unda cu na final esaki a ser aproba unanimamente, cu e palabracionnan cu e federacionnan lo ricibi dentro di poco algun informacion adicional pa nan analisa.

PLAN DI MANEHO

Secretaria General, Sra. Nicole Hoevertsz a presenta e plan di maneho pa e aña 2013, delineando e proyecto y actividadnan cu tin programa pa e aña venidero. Sra. Hoevertsz a duna un splicacion amplio di e metanan cu COA kier realisa den e aña 2013, esaki riba e

terenonan personal, interno y cu e diferente stakeholdernan. Na banda di esaki tin otro actividadnan cu COA ta desea di ehecuta y desaroya.

Momento di alegria sigur a reina cerca tur presente ora cu a anuncia cu Aruba lo ricibi mas placa pa por inverti den preparacion di e atleta y entrenadonan. Un suma di mas cu \$ 1.3 miyon (2.2 miyon florin) reparti den e cuater añanan venidero, cu e Organizacion Deportivo Panamericana (ODEPA) lo haci posibel pa e preparacionnan pa e Weganan Panamericano 2015 y e Weganan Olímpico 2016 bay na un nivel mas halto y profesional. Pa entrenadonan ODEPA lo ofrece cursonan di nivel halto, mientras cu atletanan lo haya tambe e posibilidad pa entrena den exterior, na un Centro de Alto Rendimiento (CAR). Por ultimo, Sra. Hoevertsz a duna un bunita mensahe comun yama "sinergia". Sinergia su definicion ta e interaccion di diferente elemento cu ora cu nan wordo combina, ta produci un efecto total cu

ta mas grandi cu e suma total di e elementonan individual. Cu otro palabra, COA ta boga pa union entre COA y e federacionnan, pero tambe entre COA y tur e otro stakeholdernan y tambe interno na tur nivel den COA, pa asina hunto cu COA logra exitonan deportivo den futuro pa Aruba. A lo largo ta Aruba y su deporte den su totalidad lo sali beneficia di tur e logronan.

OBHETIVONAN

E forma cla y e obhetivonan positivo pa e organizacion y su miembronan, a haci cu tanto e presupuesto y e plan di maneho a wordo aproba cu aceptacion general. Cu esaki e asamblea general di Comité Olímpico Arubano a termina na un forma exitoso. Aña 2013 ta priminti di bira uno sumamente yen di actividad un bishita mas, pero cu ayudo di tur federacion, staf, comisionnan y directiva di COA, kendenan tin tur confianza cu lo sa di sigui hiba e organizacion y deporte Arubano den su totalidad padilanti, den e direccion correcto. □

